

Cheeti da Yuuda Gimba guri giyaada

Cheetiti da qunqumaadi Yuuda naggaa handikimi. Ina yaati leē gu hhiee gu Yeesu. Ina yaati handikimi cheetiti sa hida wakinay goó /imbee Kristu, hhaã daa impakaruudisi ha maarimamaa da afa'afuuma. Maarimamati yaatii fokaakita caacaahhamisi gu gimba gu hhoiney gu didiri gu Iliitleemu. Slime, yaati hiifaafahhaahhanta hida goó /imbee Kristu, ma ibiidiri tlakwarooge. Yuuda hiti laqaaqana ila'aa'aatimisu angaamaka Ila/imbidu gu Segugo sa tlaatlaqasa hida goó /imbee Kristu. Hari amotee, ma ooyiri nara'a caacaahhamisu gu lou gu Iliitleemu haa Gimba gu Hhou gu Yeesu Kristu, idoo giyaa ilii akhasiri gooy daqa ya/abimiisee da Yeesugo.

Cehheemisu

¹ Cheetiti yaa daqa doyi dahhada ana Yuuda, tongimoo gu Yeesu Kristu, haa hhia gu coko'u gu Yakoobo. Ana sangu handikiikima cheetiti, sa unkuray daa eteedi haa da slaiye ha Iliitleemu Taataa, haa doó ga'aye ha Yeesu Kristu.

² Ana sangu firiirima ambee, /awaariru, qa-saw haa sla'amuu goó daqa Iliitleemu dahhee, hiirgidiye daqa doogunay hari khisla.

Hangu ga'aydee haa maarimamaa da afa'afuuma

³ Hhiee koi ga slae, ana haa kooma kwayru gu handikuru sa unkuray, gimba gu ilabu'uruki gaa oowani gonkotaa. Teesaaqay see, hanti arimi nara'a ambee, ba/ay sanguti handikima, mangu tlaatlaqasi unkuray, ma ilakontiri ga/aw /imba daa taatahhi ha Iliitleemu waa leë kilesi, sa hida kosi gubasli tlakwaroo.

⁴ Sa gimba, wanay hida wakinay goóba muri-ida Iliitleemu, gungii guumees hari hhaaboo tla/aã googunay, hida saa hhe'esi handikuru hukumuu gu /agituru gooina tlaatleesoogo. Hida hhangi hiifokaakidiyay ya/aboo da hhoínay gu didiru gu Iliitleemu goori, ma ibiidiri ibidinaa da slipalau-uma. Kara tlatlankiikinay Yeesu Kristu, ina gu leë Giyaadimiisay goori haa Looimoo goori.

Maarimamaa da afa'afuuma hukuruu gooina

⁵ Inkoo, unkuray gaamati hhe'esidiri caah-haraa gimbaki goõ, ana hangu sla'a maay slay-diri tuba, Taataa Iliitleemu* giyaa ilii hhe'esi ilabu'uru hida gu Israeeli hhapee da Misirigo,✧ qariqaaqari yaa hhamisi hhakira goõ gwaaba /imba.✧

⁶ Slime, slawaw malayikatira, daaba bu'udisa hari kofiyaa sigaa hadisi ha Iliitleemu, inay gi mayri daqa daa tooina loi. Iliitleemu gi qaasi inay daqa da hhanteege, tay digii khiidimi hari nyololoo da koraraa goóba hiifaakoo, ma baqamidiri balotira da didiri da hukumuu.

* **1:5 1:5 Taataa Iliitleemu:** Ti'ii handikaa waka da segi yoóti kaada tuba ti, *Looimoo gu Goõ Yeesu.* ✧ **1:5 1:5** Yu'udii kitaabuu gu Hiica/araa 5:1-12:51. ✧ **1:5 1:5** Yu'udii kitaabuu gu Faadoo 14:26-35.

⁷ Kara, slawaw yaamu gu Sodoma haa Gomoora, haa yaamu gwaa kengeemoo koinay waaree. Hida gu yaamu hhakee, inay see, yaa yondiidiri malayikatira pahha, yaa yondiidiri slipalauuma, haa gimba gu pasla gu ilatlehha gu slaqoo koina. Inay digigi /agitimi hari aslaa da koraraa gooba hiifaakoo, ma ila'aa'aatisa tleehhidiri sa hida goõ.✧

⁸ Namati teesaaqay, slime hida hhakee goó tletiitimee tletaa, yoóti tluflu'umisiiyay slaqoo koina hari tletaa hhakee. Kara, inay yoóti sisi'iyay Tawaaloo da Iliitleemu, haa yoóti wahaahanay idadu gu hhoinay gu slafee gu rawge waaree.

⁹ Mikayeeli see, malayika gu didiru gu Iliitleemu, hingaa ilii kabaaba'iyee haa Biriisimoo sa tuu'una da Musaa, gwaa koisiiba sitaakiru Biriisimoo hari belendeqesa. Ina yaati kaay kilesi tuba, "Taataa Iliitleemu, ina loi ilii'oo'iyee ugu!"

¹⁰ Teesaaqay see, hida hhanki gooba gwaa/amee Iliitleemu, inay yoóti wahaahanay gimba gi hhidinee. Kara, gimba gi khuiyeege ilahudaa see guba, inay yoóti yondiidiyay makay pahha gubasli waaway. Gu lou, hiñ na gimba guroó khawa hhamisaraa daqa dooinay.

¹¹ Iliitleemu /agitina hida hhakee, sa gimba inay sirakomaamidiyay amoo da Kayiini heedi gu tlaku. Kara, sa slahhaahhaau gu slawaraa hindaqaruumaa, hingii huuri dakoo da Bala'aamuge. Gu lou, Iliitleemu hhamisi inay,

✧ **1:7 1:7** Yu'udii kitaabuu gu Tlaatleesoo 19:11-28.

sa gimba hĩ si'iri Koora gooay, idoo giyaa iliisi'i dugugi hhamisi.✧

¹² Hida hhanki ti hhafideerii pahha tla/aã googunay, goó ilii /agintee loseenoo kokunay gu sla'amuu haa inay. Inay hingoóti /agimisiyay inay kilakoina ilamuree see gubasli, ti de'emiiseta'a pahha dingoó /agimisa inay kilakoina. Inay ti tlongata'a pahha dabasli ma'ay, doóyii fahhasiye ha pupuiya. Inay ti khai hhaka'a pahha gwaa gaagahhadee, gubasli /aamuuda /aamu gimati qatlay gu bu'uu'uru see. Kara ti khai daa tu'umi pahha haa gi kaka'iri sumuku.

¹³ Hida hhakee goóba gwaa/amee Iliitleemu, ti ilawa'íya da dihhi pahha da tlawa da didiri, yondu gooina gu ilamuree, dugoóti arina slubariya da ilawa'íya pahha. Kara, inay ti tica'eerii hhaka'a pahha goó hhangwaayusee. Iliitleemu sigaa hhe'esi, sigaa qaasi daqa hhantee da didirige da koraraa goóba hiifaakoo.

¹⁴ Enooki, okookoo gu laqwaloo da fanqu daqa Adaamugo, yaa tletimi daqa hida hhakeesii tuba, "Yu'udaa, Looimoo gu Goõ yaa khoci sliimaa haa malayika dosi daa tlinti'isi, doóbasli hiidahasa faadoo.

¹⁵ Ina yaa khay, ma hukumi hida goõ, haa gi /agitina hida hhaka'a goõ, goóba muriida Iliitleemu. Inay digiti /agitina, sa yondu gooina goõ gu tlaku giyoó yondiidiyee, muriida see guba Iliitleemu, haa sa gimba goõ gu tlaku, hida gu

✧ **1:11 1:11** Yu'udii kitaabuu gu Tlaatleesoo 4:3-8; Faadoo 22:1-35; 16:1-35; 31:16; 2 Peetiro 2:15.

koomee tlakwaroo giyoó gimbuumisiyee daqa dosii.”

¹⁶ Balalu sliimaa hida hhangi yoóti quru'iyay, yoóti dabimidiyay dakoo daqa hida wakinayge, haa yoóti sirakomamidiyay slashhaahhaau gooina gu tlaku. Kara, inay hingoótii duubiyay inay kilakoina hari gimba gu denu, haa yoóti dumbeesiyay hida wakinay, ma slayri faydaa daqa dooinaa.

Ili'oo'a haa ilakaawa

¹⁷ Inkoo, unkuray hhiee koi ga slae, slawaw gimba daa gimbuusi waka'alee ha ya'abimiisee da Looimoo goori gu Goñ Yeesu Kristu.

¹⁸ Inay sangwaa kaayri unkuray tuba, “Balalu gu hiifaakooge, maay caca'iyay hida gumaa belendegemisee Iliitleemu haa hida kosi. Hhakee na hida hhaka'a goó sirakomamidee slashhaahhaau gooina gu tlaku.”

¹⁹ Hida hhakee noó /sinay unkuray mangi deehhihintiri raqoo paslaapasloo. Inay digoóti tawaalina ha slashhaahhaau gu slaqoo koina, kara konaaiiba Muuna gu Iliitleemu wa'ay koinay.

²⁰ Teesaaqay see, hhiee koi ga slae, unkuray hangii /atlimisidee nara'a /imba doogunay daa tlinti'isige khisla. Kara, firiirima hari /uuru gu Muuna gu Iliitleemu.

²¹ Unkuray hangu ga/aydee nara'a sla'amuu gu Iliitleemuge, gi kone daqa doogunay, tay hagi ilakontay baqamidu Looimoo goori gu Goñ Yeesu Kristu. Ina hari /awaariru gosi, sangumaa hadisi slafimaa gu koraraa goóba hiifaakoo.

²² Unkuray laqama /awaariru sa hida hhaka'a gu hhidimee mala gini /mbiyay.

²³ Hida wakinay ilabu'umakina hari amoo da dafimidu inay aslaago. Kara, sa hida wakinay sigi laqantee /awaariru gu kooma gwaa/amee, haa gi wakiday qayroo koina see, daa tlufu'umisi hari seresemboo da slahhaahhaau gu slaqoo koina.

Yuuda daareesi Iliitleemu

²⁴ Inkoo, Iliitleemu goó hiidahhasa ga/aw unkuray, ma maydiri huua tlakwarooge, haa hinguraagi khay pandaa da wanqamee dosii, hari hha'aloo gubasli dakoo see.

²⁵ Ina na Iliitleemu gu ina lenkosi, Il-abu'umiisay goori hari amoo da Looimoo goori, Yeesu Kristu. Wanqamee, diira, hiidahhasa haa /uuru gu tawaaloo ti kosi ina, yadaa koraraa goóbago hiifaakoo, inkoo haa koraraa goóba hiifaakoo! Gu lou.

Burunge
Burunge: Ilaʼmbidu Gu /abu hari Burungaisoo
(Bible)

copyright © 2019 Wycliffe Bible Translators, Inc.

Language: Burunge

Contributor: Wycliffe Bible Translators, Inc.

All rights reserved.

2025-04-26

PDF generated using Haiola and XeLaTeX on 25 Apr 2025 from source
files dated 26 Apr 2025

5fd9f69c-03b6-5343-85b8-5043bec70185